

## **Dxihtsi nin baca'h San Pahblu loh ra' bwiinn Efesu**

### *GuelrgahpaDxiohs*

<sup>1</sup> Na'h Pahblu, naan tuhbi pooxtla xteenn Jesucristu laasii zi'chi xclaa'dzi Dxiohs gaca. Pwihsi cagaca'hn dxihtsi rii' loh tu bwiinn Efesu ra' nin baguyuu'-guya'zi guelriachiisto' xchi'dxyi Jesucristu, neezaa loh ra' nin ruhnn ziga pa'hca xclaa'dzi Ñi'h gaca. <sup>2</sup> Gulguica'ha guelrahcanee cun guelrbwihdxyii sto' xteenn Xtaada Dxiohs nu'h cun nee xteenn Daada Jesucristu.

### *Ruluu'yi Pahblu xcweenta guelrza'cazii nin bati'dxiloh Jesucristu pur la'hnu'h*

<sup>3</sup> Pwihsi gachiñi'za'ca nu'h lah Daada Dxiohs nin naa Xtaada Daada Jesucristu, nee ziga naa nu'h tuhsi cun Jesucristu nin nuu llaa'ndxibaa' ni'chin nezchi riinloh garaaloh guelruhntaa'yi nin rahcanee Ñi'h la'hnu'h. <sup>4</sup> Dxiohs gulii Ñi'h la'hnu'h pur xcweenta Jesucristu galohyi chin nagahdxi cwachixchih Dxiohs guidxyiyuh tin zi'chi loh si Ñi'h chuu nu'h guidi'hnn nu'h xtsi'n Ñi'h cun guelnayaa lasto' xteenn nu'h nee la'h si Ñi'h gaca'hsto' nu'h. <sup>5</sup> Nee guca'ha Ñi'h la'hnu'h tin gaca nu'h ziga llii'n dzi'tsi pa'ca Ñi'h pur xcweenta Jesucristu, laasii zi'chi bwi'hnn Ñi'h lligaaba pur nin bayuu'n sto' Ñi'h la'hnu'h. <sup>6</sup> Pwihsi pur ni'chin rachiñi'za'ca nu'h lah Dxiohs garaa dxyih pur ziga bayuu'n sto' Ñi'h la'hnu'h, ya bwi'hnntaa'yi Ñi'h

la'hnu'h pur nin naa nu'h tuhsi cun Llii'n Ñi'h nin nadzii'hi Ñi'h. <sup>7</sup> Ya ziga taantu nin guhca nadzii'hi Dxiohs la'hnu'h, balda'h Ñi'h la'hnu'h loh duhlda pur xcweenta rihn nin guxi'hi Llii'n Ñi'h. <sup>8</sup> Dxiohs cagaluu'yi Ñi'h balaaca chi'h nin nadzii'hi Ñi'h la'hnu'h ziga cagani'hi Ñi'h guel-nasiin cun guelrahcabwa' la'hnu'h, <sup>9</sup> nee cagaluu'yi za Ñi'h la'hnu'h dxyi'dxyi ra' nin nu-ugula'n Ñi'h loh xigaaba Ñi'h nin ayi bwi'hnn Ñi'h para ña'zidxiahga ra' bwiinn dez galohyi laasii bwi'hnn Ñi'h lligaaba nahpa guluu'yiloh dzi'n ra' chi pur xcweenta Jesucristu, <sup>10</sup> per nahpa zadzihn dxyih nin soobaa garia'caa gaca ziga lligaaba nin bwi'hnn Dxiohs, ya loh dxyih chi zutiaa'ha Dxiohs garaatii' ra' cohsa nin nuu nez dxibaa' cun nin rii loh guidxyiyuh tin guti'dxi Ñi'h la'h ra'n nezloh naa Jesucristu tin zi'chi guinabwa' Jesucristu la'h ra'n.

<sup>11</sup> Dxiohs rahca ruhnn Ñi'h xichi'hzi ni'chin ayi guinagahn guunn Ñi'h ninchi'hzi nin guiclaa'dzi Ñi'h naa bwen guunn Ñi'h; gulii Ñi'h la'hnu'h tin naa nu'h tuhsi cun Jesucristu tin gachica'ha nu'h hereensi nin bwi'hnn Dxiohs lligaaba guni'hi Ñi'h la'hnu'h. <sup>12</sup> Bwi'hnn Ñi'h baria'caa guhca squii' tin guiñi'za'ca ra' bwiinn ziga naa lah Ñi'h cun xquelrnabwa' Ñi'h pur nin gwa'ha ra' ba xa naza'ca naa Dxiohs cun la'hnu'h nin naa bwiinn ra' nin mwerdo'tii' gwachiisto' ra'ñi'h xchi'dxyi Jesucristu. <sup>13</sup> Zi'chiza la'h tu chin bihn tu dxyi'dxyi nin naa guchii, dxyi'dxyi nin ruta'h la'h bwiinn loh duhlda, ya zi'chi gwachiisto' tu la'h Jesucristu

cun guhcaza tu tuhsi cun la'h Ñi'h. Ya ni'chin gucah tu bwa' xteenn Spíritu Saantu xteenn Dxiohs la'n lasto' tu nin bia'han dxyi'dxyi Ñi'h guca'ha tu. <sup>14</sup> Dxiohs bani'hi Ñi'h Spíritu Saantu xteenn Ñi'h lasto' ra' nu'h tin guidu'hun guchiiza gachica'ha nu'h hereensi nin gudi'hi Dxiohs guca'ha ra' xpwiinn Ñi'h chin guza'loh Ñi'h xtsi'n Ñi'h, ya squii' naa ziga gaza' ziga guta'h Ñi'h la'h garaa ra' nin baca'bwa' Ñi'h gaca xpwiinn Ñi'h, tin guiñi'za'ca ra' ba lah Ñi'h cun xquelrnabwa' Ñi'h.

*Rbwihdxyi-rnaaba Pahblu loh Dxiohs tin guzia'ñih Ñi'h loh xigaaba bwiinn ra' nin gwachiisto' ra' xchi'dxyi Ñi'h*

<sup>15</sup> Pwihsi ziga biindxiaagapa'hn xcweenta ziga riachiisto' tu xchi'dxyi Jesucristu nee ziga nahpa za tu guelnadzii'hi lasaa' lasto' tu cun garaa ra' xpwiinn Jesucristu, <sup>16</sup> pwihsi ni'chin nin ayi radxahga'hn rudi'hihn guelzuxchiilli nezloh Dxiohs pur xcweenta tu chin rbwihdxyi-rna'ba'hn nezloh Ñi'h. <sup>17</sup> Rbwiidxyi-rna'ba'hn loh Dxiohs nin naa Xtaada Daada Jesucristu, Xtaada Dxiohs Ñi'h nin rnabwa' llaa'ndxibaa', tin guni'hi Ñi'h la'h tu tuhbi guelrahcabwa'roo' nee cun tuhbi guelruluu'yiloh xteenn ra' lligaaba nin nuula'n tin zi'chi gadzihn gacabwa' ru tu xa naa xcweenta Yu'bi Dxiohs, <sup>18</sup> nee cun rna'bazahn tin guzia'ñih Ñi'h loh xigaaba tu para gacabwa' tu cuun ni'ca nin naa guelnaza'ca nin naannloh tu zuni'hi Ñi'h la'h tu laasii gudihdxyi Ñi'h la'htu pur nin riachiisto' tu xchi'dxyi Ñi'h ya balaacachi'h lasahca

guelña'ñihroo' nin gudi'hi Ñi'h ziga hereensi la'h ra' xpwiinn Ñi'h, <sup>19</sup> nee cun balaacachi'h guelrnabwa' roo' nin na'zoo guzuh hasta ayi ria'lohtii' loh hasta na'zoo xquelrnabwa' Ñi'h nin nahpa na'zu ca'ha Ñi'h para la'h nu'h ziga naa nu'h bwiinn ra' nin ya gwachiisto' xchi'dxyi Ñi'h. Guelrnabwa' rii' naa nin la'hgahca nin baluu'yi Dxiohs cun gaduhbi la'ga'tii' xjweersi Ñi'h nee cun gaduhbi guelnadxiipa xteenn Ñi'h <sup>20</sup> chin bacwa'hn Ñi'h la'h Jesucristu, ya bati'dxi Ñi'h la'h Jesucristu tin guzohba Ñi'h xladu nanchii Daada Dxiohs nez dxibaa' tin zi'chi ya na'zoo ca'ha Ñi'h guelrnabwa', <sup>21</sup> pwihsi nahpa Ñi'h guelrnabwa' loh cuunchi'hzi gubieerna, nee loh cuunchi'hzi guelrnabwa', nee loh cuunchi'hzi guelrdzi'baloh loh snuhn ra' bwiinn, loh chyu chi'hzi bwiinn nin rnabwa', nee cun cuunchi'hzi lah bwiinn nin rdzi'baloh ruze'ta bwiinn nin nuu ra' nnah tantu loh guidxyiyuh rii' nee tantu ziga loh guidxyiyuh cuubi nin ze'-yahlda dxi'. <sup>22</sup> Ya Dxiohs batsiiga garaatii' cohsa nez ñaa' Jesucristu cun neezaa bazuh Dxiohs la'h Jesuhs tin naa Ñi'h nin rnabwa' loh garaa ra' bwiinn nin naa xquido' Ñi'h, <sup>23</sup> pwihsi xpwiinn guido' Ñi'h naa ra' ba ziga tihxi Ñi'h ya ziga ruti'dxi Dxiohs garaatii' nezloh Jesucristu, zi'chiza la'h Ñi'h ruti'dxi Ñi'h garaa ra' za cohsa nezloh ra' bwiinn nin naa xquido' Ñi'h.

## 2

*Ruta'h Dxiohs la'h nu'h loh duhlda laasii nadzii'hi Ñi'h la'hnu'h*

1 Galohyi guhca tu zigazi bwiinn guuchi pur xcweenta garaaloh ra' cohsa dxaaba xteenn duhllda nin guluu'tii tu nez loh Dxiohs, 2 pwihsi loh nin gubahan tu squii' gwana'hla tu ganaalla xtsi'n ra' bwiinn loh guidxyiyuh rii', cun bwi'hnn za tu garaa nin guhca xigaaba bwiinndxaaba nin rnabwa' loh guidxyiyuh rii', ziga zeezah rusazi'guehllda ba lasto' bwiinn ra' nin nagahdxi guzo'badxiahga xchi'dxyi Dxiohs. 3 Nee hasta la'hza nu'h gubahan nu'h ziga la'h ra' ba loh dxyih ra' nin ya gudii'dxi, bidi'hnn nu'h nin guclaa'dzichi'hzi tihxi nu'h cun bidi'hnn za nu'h ninchi'hzi nin bie'suh loh xigaaba nu, ya zi'chi baria'caa neezaa nu'h bidxyi'chinee Dxiohs la'h nu'h ziga rdxyi'chineeza Ñi'h la'h ra' snuhn bwiinn guidxyiyuh nin ayi nnaa guzo'badxiahga xchi'dxyi Ñi'h. 4 Per Dxiohs, balaaca chi'h nin naza'caduxa naa Ñi'h ni'chin balahsasto' Ñi'h la'hnu'h, 5 ya bani'hi Ñi'h guelnabahan la'hnu'h loh nin guhca nu'h zigazi bwiinnguuchi loh duhllda, yannah nahpa nu'h guelnabahan rii' pur nin naa nu'h tuhsi cun Jesucristu, nee gula'h nu'h loh duhllda pur nin balahsasto' Dxiohs la'hnu'h. 6 Chin bacwa'hn Dxiohs la'h Jesucristu loh guelguhchi, neezaa nu'h bwi'hnn Dxiohs lligaaba gula'h nu'h loh duhllda tin guhca baria'caa ziga neezaa nu'h bacwa'hndee Dxiohs la'hnu'h tuhsi cun Jesucristu, ya chin guzohba Jesucristu lahdu nanchii xteenn Dxiohs nu'h neezaa nu'h guhllda nu'hn. 7 Bwi'hnn Ñi'h squii' tin ruluu'yi Ñi'h la'hnu'h loh dxyih ra' nin ze'-yahldaa balaaca chi'h naa guelruca'hsto'

cun guelralahsasto' xteenn Ñi'h cun la'hnu'h pur naa nu'h tuhsi cun Jesucristu, <sup>8</sup> pwihsi pur nin balahsasto' Dxiohs la'hnu'h, ni'chin bata'h Ñi'h la'hnu'h loh duhlda chin gwachiisto' nu'h xchi'dxyi Ñi'h. Ni'chin ayi guunn tu lligaaba bidxeela tun pur la'hgahca xcweenta tu sino que guca'ha tun laasii Dxiohs naa nin bani'hin la'htu. <sup>9</sup> Nee ayiza guhcan pur xcweenta xiilla tuhbi dzi'n za'ca nin ñuhnn biñaachi tin zi'chi ayi chuu nin tuhbi nin guunn nayaachi, <sup>10</sup> laasii Dxiohs naa nin gulahchixchih la'h nu'h, nee la'hzaÑi'h gulahchibiñih la'hnu'h cun Jesucristu tin guidi'hnn nu'h dzi'n za'ca ra' nin bwi'hnn Ñi'h lligaaba des galohtii'yi nin nahpa guidi'hnn nu'h.

*Guridxyiisto' Dxiohs cun la'h nu'h pur Jesucristu*

<sup>11</sup> Pwihsi gulgaza'sto' tu, la'htu nin ayi naa ra' bwiinn Israel, nin rñi' ra' ba loh ra' ñi'h “bwiinn ziitu” laasii ayi tu bwa' nin riuu' ra' bwiinn Israel, ya cun naa ra'zi bwiinn guidxyiyuh riuu' bwa' chi tihxi bwiinn, <sup>12</sup> nee gulgaza'za sto' tu loh dxyih ra' nin gudii'dxi ayi nu'nbwa' tu la'h Jesucristu, nee cun bia'han zihtuza tu nezloh ra' bwiinn Israel, nee nin ayiza xi cweenta badi'hi tu ziga bia'hannee dxyi'dxyi Dxiohs la'h ra' bwiinn Israel. Sola guca'nzaa tu loh guidxyiyuh nicala zigachi'hzi ña'loh xquelnabahan tu ayi biu'nbwa' tu la'h Dxiohs nee nin ayiza xi lligaaba badzihn yihca tu ñidxi'hyi tu xa ñacanee Ñi'h la'htu. <sup>13</sup> Per ya ziga nnah, ziga naa tu tuhsi cun Jesucristu pur xcweenta llarihñ Ñi'h nin guxi'hi Ñi'h, la'htu nin guzah zihtu nez loh Ñi'h galoh nnah la'htu zeezah gahxu nezloh Ñi'h, <sup>14</sup> ni'chin nnah Jesucristu naa

guelridxyiisto' xteenn nu'h; la'h Ñi'h bachi'dxiu-bacha'ga Ñi'h la'h ra' bwiinn Israel nee cun la'h ra' za nin ayi naa ra' bwiinn Israel, tin gaca ra' ba tuhsi guiidxyi xteenn Dxiohs loh nin bazia'tii Ñi'h xcweenta dzi'n lehyi ra' nin bwi'hnn guhpaallahn lasaa' tu, <sup>15</sup> per ya ziga gucah tihxi Jesuhs loh cruhzi, bwi'hnn Ñi'h gahn bazia'tii Ñi'h dxyi'dxyi ra' xteenn lehyi nin bwi'hnn guyuu'llahn sto' ra' bwiinn Israel cun la'h ra' bwiinn ziitu, ya ziga gwabiiga garoopa cwa'h ra' ba nezloh Jesucristu chin gwachiisto' ra' ba xchi'dxyi Ñi'h, biuhn Ñi'h la'h ra' ba tuhbi guiidxyi cuubi, tin zi'chi guri-hdxyiinee lasto' lasaa' ra' ba. <sup>16</sup> Nee pur nin guhchi za Ñi'h loh cruhzi, bañihchiloh Ñi'h guel-rdxihndxinee lasaa' xteenn loh garoopa cwa'h bwiinn guiidxyi ra', ya zi'chi badi'hi Ñi'h gaapaa ra' ba guelnadzii'hi lasaa' nezloh Dxiohs tin bi-ahca ra' ba tuhsi tihxi Ñi'h.

<sup>17</sup> Zigaza caa ra' dxyi'dxyi ra' rii' loh Xchihtsi Dxiohs:

Bi' Ñi'h tin baluu'yi Ñi'h xa cwidxyiisto' bwiinn cun lasaa' ba nicala bwiinn nin bia'han zihtu nezloh Dxiohs nee nicalaza nin rii gahxu nezloh Ñi'h.

<sup>18</sup> Laasii pur xcweenta Jesucristu ziga tuhbi ziga stuhbi ra' nu'h rahca zogadzihn nu'h nezloh Daada Dxiohs pur tuhsi Spíritu Saantu nin ruhn biñih Ñi'h la'n lasto' nu'h. <sup>19</sup> Pwihsi ni'chin nnah la'htu ayiru naa tu bwiinn ziitu, nee ayiruzana naban tu zihtu hasta naa lahdxyi tu, laasii nnah la'htu nuu dxa'ga loh guiidxyi nin naa xteenn Dxiohs, nee naa za tu bwiinn nin nuu ra' yihdzi

Dxiohs. <sup>20</sup> La'htu naa tu zigazi tuhbi yuu' roo' nin guyahsa yihca ziga tuhbi muru dxiah nin naa ra' ziga pooxtla ra' cun profeta ra', ya Jesucristu ga'h naa ziga dxiah nin mwer guzuh xchihn yuu' chi. <sup>21</sup> Ya yuu' rii' cagaza' Dxiohsan pur nin naa tu xteenn garaa lahdu yuu' rii' hasta gadzihn cha'loh gacan xquido' Daada Jesucristu, <sup>22</sup> ya zi'chi la'htu cun neezaa ra' bwiinn Israel nin gwachiisto', ziga dxi'dxiu-dxa'ga tu la'h Jesucristu, rdxagalasaa' tu tin zi'chi gadzihn gaca tu tuhbi yuu' nin chuu Dxiohs pur xcweenta Spíritu Saantu Ñi'h.

### 3

*Biga'bi Pahblu tin chegaluu'yi ba xchi'dxyi Dxiohs loh ra' bwiinnziitu*

<sup>1</sup> Pwihsi na'h Pahblu, pur xcweenta dxyi'dxyi ra' rii' nuu ñie'w'hn la'n lahtsi dxi'ba pur xcweenta xchi'dxyi Jesucristu nin rulu'yi'hn loh tu bwiinn ra' nin ayi naa ra' bwiinn Israel, <sup>2</sup> pwihsi banaa gulgacabwa' la'h Ñi'h baca'bi Ñi'h na'h tin gulu'yi'hn xchi'dxyi Ñi'h la'htu. <sup>3</sup> Dxiohs baluu'yi na'h ziga naa xigaaba lliga'tsi xteenn Ñi'h ziga nin ya la'n baca'hla dxihtsi loh tu. <sup>4</sup> Ya nin gu'lda tu dxihtsi chi zacabwa' tu nu'nbwa'n xa naa dxyi'dxyi naga'tsi xteenn Jesucristu. <sup>5</sup> Dxyi'dxyi nin guhcanaga'tsi ra' chi ayi chyu bwiinn baluu'yilohtii'in loh ñi'h loh dxyih ra' nin bagudii'dxi ziahan duxala yihza, per yannah la'h Dxiohs bwi'hnn para baluu'yiloh dxyi'dxyi naga'tsi ra' chi nezloh ra' pooxtla cun nezloh ra' profeta ra' xteenn Dxiohs pur xcweenta Spíritu Saantu xteenn Ñi'h, <sup>6</sup> ya dxyi'dxyi naga'tsi ra' chi



naa dee ra': pur xcweenta xchi'dxyi Jesucristu nin ruta'h la'h ra' bwiinn loh duhlda, ruhnn Dxiohs gaca ra' bwiinn ra' nin ayi naa ra' bwiinn Israel tuhsi guihtxyi cun bwiinn Israel nin riachiisto' ñi'h xchi'dxyi Jesucristu tin garoopa cwa'h ra' ba gaca xteenn ra' ba hereensi nin bia'han dxyi'dxyinee Dxiohs la'h ra' bwiinn Israel.

<sup>7</sup> Na'h bie'dxiahldaa biga'bi'hn gulu'yi'hn xchi'dxyi Jesucristu pur balahsasto' Dxiohs na'h, nee rahca ru'nnahn dzi'n rii' laasii rca'hahn jweersi roo' nin runi'hi Dxiohs na'h, <sup>8</sup> nee nicala naan llihgui'hntii' loh garaa ra' xpwiinn Dxiohs, na'h naan nin bani'hi Ñi'h guelrahcanee xteenn Ñi'h tin gulu'yi'hn xchi'dxyi Ñi'h loh ra' bwiinn nin ayi naa ra' bwiinn Israel tin gacabwa' ra' ba balaaca chi'h lasahca nin nahpa Jesucristu para la'hnu'h, <sup>9</sup> ya Dxiohs nin bwi'hnncha'yi garaatii' baca'bi Ñi'h na'h tin gulu'yi'hn la'h garaa ra' bwiinn xa naa xcweenta dxyi'dxyi naga'tsi nin guhpacha'yi Ñi'h loh yihza ra' nin gudii'dxi tin nnahyi cayiinlohon. <sup>10</sup> Cagaria'caa squii' tin nnah pur xcweenta bwiinn guido' ra', garaa ra' guelrnabwa' ra' cun garaa ra' guxchiisi ra' nez dxibaa' gadzihn gacabwa' ra' ba guelnasiin duxa xteenn Dxiohs loh garaa ziga ruhnn Ñi'h. <sup>11</sup> Dxiohs bwi'hnn Ñi'h lligaaba squii' desde galohtii'yi ni'chin bi' Daada Jesucristu tin baria'caa guzohba talpa'h ziga guclaa'dzi Dxiohs gaca. <sup>12</sup> Ya pur xcweenta nin riachiisto' nu'h xchi'dxyi Jesucristu ayi riuu' guelnadxxyi'bi lasto' nu'h ziga choobiiga ganaaba nu'h nezloh Dxiohs. <sup>13</sup> Ya ni'chin rna'ba'hn loh tu ayi guiria'hgahn

tu pur nin cagati'dxiloon pur xcweenta tu; maz guldxiyahxi laasii dee naa tuhbi guelnaza'ca para la'htu.

*Guelnadzii'hi lasaa' pur xcweenta Jesucristu*

<sup>14</sup> Ya pur cweenta rii' ni'chin nin rusia'chyu lli-ibihn nez delaanta loh Daada Dxiohs nin nabahan dzi'tsi dxibaa', <sup>15</sup> Dxiohs nin baza'loh garaatii' ra' nin nuu nez llaa'ndxibaa' cun loh guidxyiyuh. <sup>16</sup> Pwihsi rbwihdxyi-rna'ba'hn loh Dxiohs tin gutarloooh Ñi'h guelnaza'ca xteenn xquelña'ñih Ñi'h para la'htu nin gaca ziga gaca nadxipasto' tu pur xcweenta Spíritu Saantu xteenn Dxiohs <sup>17</sup> tin zi'chi ba chuu nabahan Jesucristu la'n lasto' tu pur tantu nin riachii sto' tu xchi'dxyi Ñi'h tin zi'chi guina'zu xtulbaa' za'ca tu loh guelnadzii'hi lasaa' xteenn Jesucristu, <sup>18</sup> tin zi'chiza gadzihn gacabwa' tu cun snuhn ra' xpwiinn Jesucristu balaaca chi'h nabi'hyi nee nu'hla nee gueeta nee naa guiya' loh guelnadzii'hi lasaa' xteenn Jesucristu. <sup>19</sup> Rna'ba'hn loh tu, pwihsi, tin gulgadxi'hyi loh guelnadzii'hi lasaa' xteenn Jesucristu nin naa mahzi guroo'roo' loh garaa ra' cohsa roo' nin bidia'ha nu'h tin zi'chi baguibahannee nu'h garaa xquelnaza'ca Dxiohs.

<sup>20</sup> Yannah gaca lasahcaduxa lah Dxiohs nin nahpa guelnabwa' para guunn ziahanroo duxa ru cohsa loh nin ganaaba nu'h o nin guidi'hnn nu'h lligaaba pur xcweenta xquelnabwa' Ñi'h nin nuu nabahan la'n lasto' nu'h. <sup>21</sup> Lasahca duxa naa lah Dxiohs nezloh bwiinn guido' nee pur xcweenta Jesucristu para loh garaa dxyih nin banaa para tu'pazi. Zi'chi gaca pwihsi.

## 4

*Radxa'ga lasaa' nu'h pur Spíritu Saantu*

<sup>1</sup> Pwihsi ziga ñie'w'hn pur xcweenta xchi'dxyi Jesucristu rna'ba'hn loh tu gulguibahan ziga nin rga'ha guunn tu la'htu nin bibwi'hi pur xigaaba Dxiohs. <sup>2</sup> Gulgahca bwiinn nado'laadzi, bwiinn naza'caduxa, gulgahpa paseensi, nee gulgahpa guelnadzii'hi lasaa' cun ziga tuhbi cun ziga stuhbi lasaa' tu, <sup>3</sup> nee gulgui'hnn para guibahan tu tuhsi loh lligaaba tin ayi taa'ha loh lasaa' tu cun guelrahcanee xteenn Spíritu Saantu nee pur xcweenta za guelridxyiisto' nin ruchi'dxiu-rucha'ga la'htu.

<sup>4</sup> Zi'chi tuhsi tihxi naa nu'h loh Jesucristu, nee tuhsiza naa xigaaba nu'h cun la'h Ñi'h, cun tuhsi za hereensi nin naannloh nu'h zachica'ha nu'h loh nin gudihdxyi la'hnu'h, <sup>5</sup> nee tuhsi za Daada cun tuhsi za guelriachiisto', nee cun tuhsi za guelrohbañihsa, <sup>6</sup> nee nuu za tuhbi dxi'h Daada Dxiohs nin rnabwa' loh garaatii', nin zuu galaayillee garaatii' nee nuu Ñi'h loh garaatii'.

<sup>7</sup> Per cada tuhbigah ra' nu'h bachica'ha ra' nu'h dzi'n ra' nin babwi'hnn Jesucristu lligaaba bachica'ha ra' nu'h. <sup>8</sup> Pwihsi ni'chin rñi' loh Xchihsi Dxiohs squii':

Chin bacah Ñi'h llaa'ndxibaa' hasta rnabwa' Ñi'h,  
ya bwi'hnn Ñi'h gahn loh garaa ra' guelrnabwa',

ya chi'chi bwi'hnntaa'yi Ñi'h yihca ra' xpwiinn Ñi'h tin guunn ra' ba xtsi'n Ñi'h.

<sup>9</sup> ¿Xi zee loh dxyi'dxyi rii' ziga rñi'in, “Bacah Ñi'h”? Pwihsi nin raria'caa rñi' dxyi'dxyi rii' naa biehtaza Daada Jesucristu hasta ria'han

gabihldxyi. <sup>10</sup> Nin biehta chi ni'chi gahcan nin bacah za hasta naa mahzi guiya'duxa nez dxibaa' tin zi'chi guca'ha Ñi'h nahpa Ñi'h guelrnabwa' nez dxibaa' cun loh guidxyiyuh. <sup>11</sup> Ya la'h gahca za Ñi'h bwi'hnn Ñi'h lligaaba bazuh Ñi'h la'h ra' bwiinn nin naa ra' pooxtla, ya spaaldae ra' ba bazuh Ñi'h ziga profeta ra', spaaldae ra' ba ziga nin riagui'hnbñih xchi'dxyi Jesucristu, spaaldae ra' ba ziga gaca pastohr ra', cun spaaldae ra' ba ziga mwehsu ra'. <sup>12</sup> Ya zi'chi bazuh Ñi'h nin naa ra' xpwiinn Ñi'h tin guunn ra' ba dzi'n nin badi'hi Ñi'h cada tuhbigah ra' ba nee tin zi'chi guunn ra' ba chuu ziga llii'dzi tihxi Jesucristu garaa lahdu, <sup>13</sup> hasta gadzihnyi dxyih nin gaca garaa ra' nu'h tuhsi loh ziga riachiisto' ra' nu'h nee gadzihnyi dxu'nbwa' za'ca nu'h Llii'n Dxiohs, ya zi'chi gaca nu'h bwiinn nin baniin ca zuu loh ziga rahcabwa' nu'h xchi'dxyi Ñi'h, ziga tuhbi bwiinn nin baguroo' loh xquelrnabwa' Jesucristu. <sup>14</sup> Ya ayiru chyu gusaa'n gaca xigaaba nu'h ziga xigaaba biñi'n tin biñi'n ayi guinagahntii' ruhnn bwiinn gahn rusagui'hi ra' ba la'h ra' bi cun dxyi'dxyi nin ayi gallu'yi nin ruluu'yi ra' ba laasii nuu ra' bwiinn nin nasiin nin ruhnn ra' squii'. <sup>15</sup> Mahz bwen gabwe'hecaa nu'h guidi'hnn nu'h ziga chozah nu'h loh dxyi'dxyi nanchii cun guidxiaapaza nu'h guelnadzii'hi lasaa' lasto' nu'h cun chyuchi'hzi bwiinn ni'chin nahpa guidi'hnn nu'h para chioo nu'h loh garaatii' guelnaza'ca xteenn nin naa Daada nin dzi'baloh loh nu'h nin naa la'h Jesucristu. <sup>16</sup> Ya pur Jesucristu rna'zudxa'ga ra' xpwiinn Ñi'h zigazi tuhbi tihxi bwiinn

tin zi'chi na'zu za'ca ra' ba tin rahcanees lasaa' ra' ba pur ziga naa xtsi'n cada tuhbigah ra' ba, ya zi'chi cadxi'hyi ra' ba xa cayahca ziahanru ra' bwiinn loh guelnadzii'hi xteenn Jesucristu.

*Tuhbi guelnabahan nacuubi nin rdxeela pur la'h Jesucristu*

<sup>17</sup> Pwihsi dxyi'dxyi ra' rii' naa nin rñi'n loh tu nee ruca'bizañin la'htu pur lah Daada Jesucristu, ayiru chezah guibahan tu ziga nabahan ra' bwiinn nin ayi nu'nbwa' la'h Dxiohs, bwiinn ra' nin sola nabahan ra' loh lligaabachi'hzi nin riagadziiba yihca ra' ñi'h. <sup>18</sup> Ya nuu nacahyitii' loh xigaaba ra' ba; la'h ra' ba ayi rudi'hi guuxta sto' ra' ba loh guelnabahan nin runi'hi Dxiohs laasii naa ra' ba bwiinn nadii'dxii rwaa' ra' ñi'h, <sup>19</sup> nee ya guhca dxii'pa sto' ra' ba ya guca'ha mahn ra' ba, ayiru xa dxia'chyu loh xigaaba ra' ba, ya zeeza'bi ra' ba loh garaaloh cohsa dxaaba ra', <sup>20</sup> per la'htu ayi biu'nbwa'dxi'h tu Jesucristu, tin nee tu gaca tu bwiinn zi'chi ra', <sup>21</sup> ya sidela guchii tu bazo'badxiahga tu xchi'dxyi Jesucristu nee cun sidela neezaa basi'dxi tu xcweenta Ñi'h nin naa dxyi'dxyi guchii, <sup>22</sup> pwihsi basaa'n tu loh garaa cohsa ra' nin gudii'dxi-guzah nin gubahan tu loh ñi'h. Pwihsi ni'chin nnah gulgasia'han garaa ra' cohsa dxaaba ra' chi nez dihtsi tu, laasii ni'chi ra' nin basagui'hi la'htu loh dxyih ra' nin gudii'dxi. <sup>23</sup> Ni'chin nnah gulgasacuubi lasto' tu cun loh xigaaba tu, <sup>24</sup> nee gulgasacuubi za la'htu loh guelnabahan nacuubi nin basiinloh Dxiohs pur la'htu tin zi'chi pur xcweenta xchi'dxyi Ñi'h guluu'yi xquelnabahan tu tuhbi guelnabahan

nayaa, tuhbi guelnabahan nin nallu'yi para loh xtsi'n Dxiohs.

<sup>25</sup> Pwihsi ni'chin ayiru chezah tu guuyi tu dxi-ixi'hw, mahz gulguiñi' dxyi'dxyi nin naa guchii loh ra' lasaa' tu laasii la'hnu'h naa nu'h bwiinn ra' nin naa tuhsi famihyi.

<sup>26</sup> Sidela la'htu rdxyi'chi tu gulguia'ha ayi dxi-aaba tu loh duhlda, nee gulgui'hnn pur ayi gahw llahn lasto' tu loh gaduhbi dxyih. <sup>27</sup> Ayi gusaa'n tu gusia'chi bwiinndaaba lasto' tu.

<sup>28</sup> Bwiinn nin naa bwiinn gubaa'n ayiru guunn ba gubaa'n, mahzi guunn ba dzi'n cun naa ba tin zi'chi gaapaa ba nin gacanee ba la'h ra' bwiinn ra' nin ayi xi nahpa.

<sup>29</sup> Nee ayi gusaa'n tu guiria'h dxyi'dxyi nnah rwaa' tu, mahz gusia'ha rwaa' tu guiñi' tu dxyi'dxyi za'ca ra' tin zi'chi guunn tu gahn guchioo' tu ziga chechiisto' ra' snuhn bwiinn nin dxihnn dxiahga ra' xchi'dxyi tu. <sup>30</sup> Ayi chi'hyi tu nez guibiin lasto' Spíritu Saantu xteenn Dxiohs nin bwi'hnn para gucah tu bwa' la'n lasto' tu para hasta loh dxyihyi nin gadzihn chee tu hasta nuu Dxiohs.

<sup>31</sup> Gulcwe'he sto' tu garaaloh ra' llahn nin cayuhnn naltaa la'n lasto' tu, ziga guelnadxii'chi, guelrbwihdxidxiah cun guelrbwidxihndxinee lasaa', nee cun garaaloh ra' ru cohsa dxaaba ra'.

<sup>32</sup> Gulgahca bwiinn nado'laadzi nee gulgalahsa sto' tu lasaa' tu ziga tuhbi ziga stuhbi ra' ba, nee gulgui'hnn pardohn lasaa' ziga tuhbi ziga stuhbi za tu zigaza bwi'hnn Dxiohs pardohn la'htu pur xcweenta Jesucristu.

## 5

*Xa nahpa guibahan ra' bwiinn ra' nin naa ra' llii'n Dxiohs*

<sup>1</sup> La'htu nin naa ra' llii'n Dxiohs nin nadzii'hi dzi'tsi Ñi'h, gulgui'hnn pur gaca tu ziga la'h Ñi'h, <sup>2</sup> gulgahpa guelnadzii'hi lasto' lasaa' tu ziga gahca guhpa Jesucristu guelnadzii'hi lasto' Ñi'h cun la'hnu'h ya basaa'n Ñi'h guhchi Ñi'h loh cruhzi pur la'hnu'h tin guhca Ñi'h zigazi tuhbi guhn nin bichia'h nahxi para nezloh Dxiohs.

<sup>3</sup> La'htu nin naapa'h xpwiinn Dxiohs nin ayi guuyi tu nin tuhbiti'hn xcweenta cohsa guelgubwihlli nee nin stuhbiza cohsa dxaaba ra' nee nin ayiza sa'bi sto' tu xteenn stuhbi bwiinn, <sup>4</sup> nin ayiza guuyi tu dxyi'dxyi nin rusia'han xtuhyi la'h stuhbi bwiinn, nee ayiza guuyi tu dxyi'dxyi nin riagadziibachi'hzii yihca tu, nee ayiza gaca tu bwiinn nado'balaadzi, laasii dee ra' ayi xi gallu'yi ra'n mas nin guunn tu gulgadxi'hyi xa gudi'hi tu guelzuxchiilli la'h Dxiohs nin nuu dxibaa', <sup>5</sup> laasii ya naann tu bwiinn nin naa bwiinn gubwihlli o bwiinn nin riagadziiba garaaloh cosa dxaaba loh xigaaba ñi'h o bwiinn nin rza'bi sto' ñi'h xiteenn lasaa' ñi'h, o bwiinn nin raann dxaan; bwiinn ra' squii' ayi chu'tii ra' ba loh xquelrnabwa' Jesucristu nin naa xquelrnabwa' za Dxiohs. <sup>6</sup> Gulguia'ha tin ayi chyu gusagui'hi la'htu cun dxyi'dxyi nin ayi gallu'yi ra', laasii pur xcweenta ra' dee' ziaaba xquelnah xteenn Dxiohs yihca bwiinn ra' nin ayi guzo'badxiahga xchi'dxyi Ñi'h. <sup>7</sup> Ni'chin gulguia'ha tin ayi guidxa'ga tu loh ra' bwiinn ra' chi.

<sup>8</sup> La'htu cadxyih gubahan tu loh nacahyi xteenn duhlda, per nnah pur nin badzihn gahxu tu nezloh Jesucristu, ni'chin bazia'ñih Ñi'h loh xigaaba tu, ni'chin gulguibahan zigazi bwiinn ra' nin rzah loh xquelña'ñih Jesucristu, <sup>9</sup> laasii garaa ra' bwiinn ra' nin rzah ra' loh guelña'ñih, ruhnn ra' ba dzi'n za'ca nee zohba dxyi'dxyi guchii rwa' ra' ba. <sup>10</sup> Ni'chin gulchi'hyi xa gusiahxi tu lasto' Daada Jesucristu. <sup>11</sup> Ayi chi'hyi tu xa guidxa'ga tu loh ra' nin rzah ra' loh nacahyi xteenn duhlda, mas gulgui'hnn xa guluu'yi tu la'h ra' ba xa nabahan tu loh lla'ñih xteenn Dxiohs tin zi'chi gacabwa' ra' ba nabahan ra' ba loh duhlda. <sup>12</sup> Laasii hasta xtuhyi naa chyu guuyi xcweenta cosa dxaaba nin ruhnn ra' ba rala'n. <sup>13</sup> Per chin riinloh ra' garaa ra' dzi'n dxaaba ra' rii' loh guelña'ñih, ria'han nayaa ra'n <sup>14</sup> laasii ruzia'ñih guelña'ñih yihcan. Ni'chin caa loh dxihtsi squii':

Babahn yi'h nin rahsi xa'ta lu'h, gwastii loh ra' bwiinn guuchi, ya Jesucristu guzia'ñih yihca lu'h.

<sup>15</sup> Pwihsi ni'chin gulguibahan za'ca; ayi guibahan tu ziga bwiinn nin naa bwiinn dxiipatii' ra', sino que gulgahca bwiinn nasiin. <sup>16</sup> Ayi gusaa'n tu tiidxi lliaa'ha ra' dxyih, laasii la'n dxyih ra' rii' zeedahlaatii' bwiinn ra' nin ruhnn ra' dzi'n dxaaba ra'. <sup>17</sup> Ni'chin ayi gusaa'n tu gaca tu bwiinn mbah tii'; ni'chin mas gulchi'hyi guunn tu ziga naa xigaaba Daada Jesucristu. <sup>18</sup> Ayi gaca tu bwiinn gwaa', laasii guerree' ruhnn rbwe'hetii' du'h naa bwiinn cun ziga dzi'n dxaaba nin ruhnn ra' ba, mas gulgadi'hi lasto' tu guunnyihdzi Spíritu Saantu xteenn Dxiohs. <sup>19</sup> Nin guunn tu naa mas



bwen gulgui'dxyi'dxyinee lasaa' cun saalmu ra' cun guldxil'da caantu ra' nee cun himnu ra' la'n lasto' tu para la'h Daada Jesucristu, <sup>20</sup> nee garaa dxyih tii' gulgadi'hi guelzuxchiilli nezloh Daada Dxiohs pur lah Jesucristu.

*Ziga nahpa guibahannee lasaa' ra' xpwiinn Jesucristu*

<sup>21</sup> Ziga tuhbi tu ziga stuhbi tu, gulchuu-gulcha'zi xchi'dxyi lasaa' tu laasii banaa tu bwiinn ra' nin ruzo'badxiahga xchi'dxyi Jesucristu.

<sup>22</sup> La'htu gunna'h ra' nin ba bachinaa; gulgazo'badxiahga xchi'dxyi che'hla tu ziga ruzo'badxiahga tu xchi'dxyi Jesucristu, <sup>23</sup> laasii ndxi'hw naa nin nahpa guinabwa' la'h gunna'h nin naa che'hla ba, ziga naa Jesucristu la'h Ñi'h dzi'baloh Ñi'h loh ra' bwiinn nin naa xquido' Ñi'h nin naa ziga tihxi Ñi'h pur nin bata'h Ñi'h la'h ra' ba loh duhl'da. <sup>24</sup> Ya ziga ruzo'badxiahga ra' bwiinn guido' ziga rnabwa' Jesucristu guunn ra' ba, zi'chi za gunna'h ra' nin nuu ra' che'hla ra' ñi'h nahpa guzo'badxiahga ra' ba garaa ra' xchi'dxyi che'hla ra' ba.

<sup>25</sup> Bwiinn ra' nin ba bachinaa ra', gulgantsii'hi la'h gunna'h nin naa che'hla tu ziga ruca'hsto' Jesucristu la'h ra' bwiinn nin naa xquido' Ñi'h ya bati'dxiloh Ñi'h pur la'h ra' ba. <sup>26</sup> Bwi'hnn Ñi'h squii' tin basiaa Ñi'h xtuhl'da ra' bwiinn ra' nin naa xquido' Ñi'h tin zi'chi gaca ra' ba tuhbi bwiinn nayaa nezloh Ñi'h nee baa za lasto' ra' ba cun xchi'dxyi Ñi'h, zigazi raa lahdxi dxiimma cun ñihsa, <sup>27</sup> tin zi'chi guluu'yi ra' xpwiinn guido' Ñi'h

zigazi tuhbi lla'ñih roo' nee ayi guidxeela nin tahyi cohsa dxiimma cun ayiza xi dxia'dxi ra' ba, sino que gaca ra' ba bwiinn nin naa para la'hsiÑi'h, nin ayi xi tuhbi xtuhlda ra' ñi'h. <sup>28</sup> Pwihsi ziga nadzii'hi tuhbi ndxi'hw nin ba bachinaa tihxi gahca ba, zi'chi za nahpa gaca nadzii'hi ba la'h gunna'h nin naa che'hla ba. Bwiinn nin nadzii'hi la'h gunna'h nin naa che'hla ba nadzii'hi za ba la'hgahca ba, <sup>29</sup> laasii ayi nin tuhbi bwiinn nin rdxyi'chinee tihxi ba, sino que rahpa ban cun guelnadaa ziga za nahpa Jesucristu la'h ra' bwiinn ra' nin naa xpwiinn guido' Ñi'h, <sup>30</sup> laasii la'hnu'h naa nu'h ziga tihxi Ñi'h. <sup>31</sup> Caa loh Xchihtsi Dxiohs squii': "Ni'chin la'h ra' ndxi'hw rusia'hann ra' ba la'h ra' xcuzahn ba tin rca'ha ba la'h gunna'h nin naa che'hla ba, ya garoopa ra' ba raria'caa naa ra' ba ziga tuhsi bwiinn." <sup>32</sup> Dee naa tuhbi cohsa naga'tsi roo', per na'h cañi'n xcweenta Jesucristu nee cun xcweenta xpwiinn guido' Ñi'h. <sup>33</sup> Ni'chin loh garaatii' cada tuhbigah tu gantsii'hi tu la'h gunna'h nin naa che'hla tu ziga nadzii'hi tu la'hgahca tu, ya gunna'h ra' nahpa chuu ba cha'zi ba xchi'dxyi ndxi'hw nin naa che'hla ba.

## 6

<sup>1</sup> Biñi'ni'hn ra', gulgazo'badxiahga xchi'dxyi xcuzahn tu pur xcweenta xchi'dxyi Jesucristu laasii squii' rga'ha guunn tu, <sup>2</sup> laasii squii' naa mweer dxyi'dxyi lehyi nin guza'loh guni'hi guelnaza'ca la'htu: "Gulgui'hnn lasahca la'h xpah tu cun xmah tu, <sup>3</sup> tin zi'chi guibahan nasaa tu nee

gaapaa za tu ziroo' guelnabahan loh guidxyiyuh rii'."

<sup>4</sup> Ya la'htu nin naa ra' daada ra', ayi chi'hyi tu nez guidxyi'chi llii'n tu, mas gulchi'hyi xa gusi'dxi tu la'h ra' bi cun gulguiñi'nee la'h ra' bi tin gaapaa ra' bi guelnadzii'hi xteenn Daada Jesucristu.

<sup>5</sup> La'htu mooza ra', gulgazo'badxiahga xchi'dxyi bwiinn nin ruhnn tu xtsi'n ra' ñi'h; gulgui'hnnan cun gaduhbi guelnado'laadzi xteenn tu, nee gul-cuu' guelnadxyi'bi la'n lasto' tu ziga tin ayi gadx-eela tu cayaa'lla tu loh xtsi'n ballwaa'n tu mas gulgui'hnnan zigazi cayuhnn tu la'gahca xtsi'n Jesucristu. <sup>6</sup> Gulgui'hnn xtsi'n ba cun gaduhbi sto' tu ayi chin zuu si dxi'h ba loh tu tin ayi para guunn si dxi'h dxia'han za'ca tu loh ba; maz gulgui'hnnan ziga guluu'yi naa pa'h tu xpwiinn Jesucristu ziga cayuhnn tu cun gaduhbi sto' tu ziga xclaa'dzi Dxiohs gaca. <sup>7</sup> Gulgui'hnn xtsi'n ba cun gaduhbi sto' tu zigazi guluu'yi cayuhnn tu tuhbi dzi'n nezloh Daada Jesucristu, ayi nezloh dxi'h tuhbi ndxi'hw, <sup>8</sup> laasii banaann tu cada tuhbigah tu nicala naa tu bwiinn nin gudoo' loh dzi'n o bwiinn nin ayi gudoo' loh dzi'n, zica'ha ba loh Daada Jesucristu ziga naa xcweenta dzi'n za'ca nin bwi'hnn ba.

<sup>9</sup> Ya la'htu nin naa ra' ziga ballwaa'n ra', gul-gahca nado'laadzi za nezloh ra' xmooza tu nee ayi gusa'cazii tu la'h ra' xmooza tu laasii banaann tu la'htu cun la'h ra' ba nacweenta tu ziga mooza gahca nezloh Daada Jesucristu nin nuu dxibaa' laasii la'h Ñi'h ayi ruhnn Ñi'h guriin-guriin nezloh cada tuhbigah bwiinn.

*Nin rulaloh la'h ra' xpwiinn Jesucristu loh xichi'hzi*

<sup>10</sup> Yannah bwiitsi ra'n, gulgahca bwiinn nadxi-  
ipalaa'dzi loh guelrahcanee xteenn Daada Jesu-  
cristu pur xcweenta guelrnabwa' roo' nin nahpa  
Ñi'h. <sup>11</sup> Gulgahcu ziga lahdxi dxi'ba xteenn  
Dxiohs nin gulaloh la'htu, tin zi'chi guunn tu  
gahn guti'dxiloh tu loh garaa ra' guelrusagui'hi  
xteenn bwiinndxaaba, <sup>12</sup> laasii ayi chyu cadxi-  
ndxinee la'h tuhbi bwiinn nin caa bwe'hla cun  
nin nuu dzihta, sino que dxudxihndxinee nu'h  
la'h spíritu ra' nin naa ra' ziga bwih nin za'bi  
nezloh bwih nez llaa'ndxibaa' nin ca'ha guelrn-  
abwa' cun nin ca'ha guelguxchisi, cun nin rn-  
abwa' ra' za loh guidxyiyuh nacahyi rii', nee cun  
neezaa nin nahpa guelrnabwa' nezloh bwih gadi-  
idxi guidxyiyuh. <sup>13</sup> Pwihsi ni'chin gulcu'guihn  
gacu tu zigazi tuhbi lahdxi dxi'ba nin gulaloh  
gaduhbi tihxi tu nin naa xteenn Dxiohs, tin zi'chi  
zahca guti'dxiloh tu loh garaa ra' dxyih dxaaba ra'  
tin chin ba bati'dxiloh tu loh dxyih ra' chi zahca  
suh dzi'tsi tu. <sup>14</sup> Gulsudzi'tsi pwihsi loh ganaalla  
nin naa nanchii pa'h, nee gulgaca nayaatii' loh  
dxyi'dxyi nanchii. <sup>15</sup> Gulcwihnasiin, pwihsi, tin  
guzee tu chegaluu'yi tu xchi'dxyi Jesucristu nin  
rbahchidxyii lasto' ra' bwiinn, <sup>16</sup> laasii guelriachi-  
isto' tu gaca ziga nin suu caa loh ra' bahza ra'  
nin zohba bwehla yihca ra' ñi'h nin naa xteenn  
bwiinndxaaba. <sup>17</sup> Pwihsi nin gula'loh loh xi-  
gaaba tu naa naann pa'h tu gula'h tu loh duhlda,  
ya xchi'dxyi Dxiohs naa ziga tuhbi spahda nin  
runi'hi Spíritu Saantu la'htu. <sup>18</sup> Pwihsi ayi gusaa'n  
tu ziga cwiidxyi-guinaaba tu loh Dxiohs garaa

dxiyih cun guelrahcane xteenn Spíritu Saantu, nee gulgahca nasiin cun ayi guiria'hgahn tu, nee gulcwiidxyi-gulguinaaba pur xcweenta garaa ra' xpwiinn guido' Dxiohs. <sup>19</sup> Gulguinaaba za loh Dxiohs pur xcwee'ntahn tin zi'chi guni'hi Dxiohs dxyi'dxyi nin guiñi'n nee tin ayi guidxyihbihn guiñi'n dxyi'dxyi naga'tsi xteenn Jesucristu. <sup>20</sup> Dxiohs guxe'hla na'h tin gulu'yi'hn dxyi'dxyi rii', nee pur xcweentan nin nuuñie'w'hn nnah. Gulguinaaba loh Dxiohs tin zi'chi guiñi'n dxyi'dxyi rii' sin ayi guidxyihbihn, nee guiga'ha guiñi'ñin.

*Lulchima guelrgahpa Dxiohs*

<sup>21</sup> Tíquicu, nin naa bwihtsi dzi'tsi nu'h loh xcweenta Jesucristu, nee nanchii naa xigaaba bi loh xtsi'n Daada Jesucristu; la'hbi dxi' bi tin guuyidxyi'dxyi bi loh tu cweenta ziga caza'ca'hn. <sup>22</sup> Pwihsi ni'chin guixe'hla'hn bi para la'htu tin nnaa bi loh tu xa dxuu nu tin zi'chi cu'gui'w bi lasto' tu.

<sup>23</sup> Daada Dxiohs nee cun Daada Jesucristu guni'hi guelridxyiisto' cun guelruca'hsto' lasaa' nee cun guelriachiisto' la'htu nin naa ra' bwihtsi lasaa' ra' nu'h loh Jesucristu. <sup>24</sup> Ya zuhnntaa'yi Ñi'h yihca tu garaatii' tu nin zeezahdzi'tsi ruca'hsto' la'h Daada Jesucristu. Zi'chi gaca pwihsi.

**Xchi'dxyi cuubi dxiohs nin bie'galuu'yi daada  
Jesucristu (El Nuevo Testamento en el  
zapoteco de Chichicapan y en español)  
New Testament in Zapotec, Chichicapan  
(MX:zpv:Zapotec, Chichicapan)**

copyright © 1990 Wycliffe Bible Translators, Inc.

Language: Zapotec, Chichicapan

Translation by: Wycliffe Bible Translators, Inc.

Zapoteco, Chichicapan [zpv], Mexico

**Copyright Information**

© 1990, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Chichicapan

**© 1990, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files dated 29 Jan 2022

f751ae13-0cd1-54fd-8c16-86718fb9cd5b